

Piginnaanngorsaaqqinneq pillugu ilitsersuut

Imai

Qulaajaasarneq.....	3
Suna siunertaava	3
Sunik imaqarpa	3
Sulisinnaassuseq.....	4
Sulisinnaassuseq qanoq nalilersorneqassava	4
Inuussutissarsiorsinnaassutsimik aamma sulisinnaassutsimik naliliinerit assigiinngissutaat	5
Sulisinnaassutsimik misiliineq	5
Pilersuinermut tunngavigisat	5
Kina qulaajaanermik ingerlatsisuusinnaava	5
Piginnaanngorsaaqqinneq.....	6
Inuit pineqartut	6
Siunertaq	6
Sulisinnaassutsip killeqarnera	6
Nammineq peqataanissaq.....	7
Kajumissuseq	7
Innuttaasup peqataatinneqarnera	7
Piginnaanngorsaaqqinneq sunik imaqarsinnaava	8
Inuussutissarsiorsinnaanermik inerisaalluni suliniutit	8
Ilinniagaqarneq.....	8
Piginnaanngorsaaqqinnissamut pilersaarut aamma piginnaanngorsaaqqinnissamut isumaqatigiissut.....	9
Sivissususia	9
Malitseqartitsineq	9
Suliffeqarfiup aqqissuunneqarnera aamma sullisit il.il.	10
Suliffeqarfinni piginnaanngorsaaqqinnermik akissarsianut tapiissutit	10
Paassutissanik ingerlatitseqqittarneq	12
Neqeroorutit aamma pilersuineq, takussutissat	12
Sulinnigiffeqarneq	12
Eqaannerusumik sulineq	12
Inuit pineqartut	13
Tamakkiisumik affarmilluunniit aningaasaliissuteqarneq	13
Qajassuussineq / Qajassuunneqarnissamik pisariaqartitsineq	13
Piffissaq suliffiusussaq	14
Suliassat isumagineqartussat	14

Pilersuineq – nalunaaquttap akunnermusiaqarneq naleqqutinngilaq.....	15
Napparsimanerup nalaani suliffissarsiortunut ikiorsiissutinik pisinnaangilaq	15
”Malittarisassaq nutaaq”	15
Sulisinnaassutsimik nalilersuineq	16
Minnerpaamik akuliunneq	16
Utertitassat procentiat	16
Siusinaartumik soraarnerussutisiaqarneq aamma eqaannerusumik suliffeqarneq ataatsikkoortinneqartassanngillat.....	16
Malitseqartitsineq	16
Aningaasaliissutaasut atuuffissaasa sivisussusissaa	17
Ukiut pingasukkaarlugit sulisinnaassutsimik nalilersueqqittarneq	17
Akissarsiat pillugit isumaqatigiissut.....	17
Immikkut tapinut aningaasartuutit utertinneqarneq ajorput	18
Nuunneq	18
Suliffissaaleqineq, eqaannerusumik suliffimmik annaasaqarneq	18
Allaffissorneq aamma naammagittaalliuuteqarneq.....	18
Akiliutit utertinneqartarneri	18
Naammagittaalliuuteqarneq	19
Malittarisassat attuumassuteqartut allat.....	20
Allakkiornissamut pisussaaffik.....	20
Inunnut paasissutissat pillugit inatsit	20
Allanut napangiussisussaataitaneq	20
Paasissutissanik ingerlatitseqqittarneq	21
Illuatungiusunik tusarniaaneq	21
Tungavilersuisarneq	21
Naammagittaallionissamut ilitsersuut	22
Suliami peqataasinnaanginneq	22
Ilanngussat.....	22
Suliffeqarfinni piginnaangorsaaqqittarnermut isumaqatigiissut	22
Piffissap ilaani nikerartumi sulisarnissamut isumaqatigiissut	22

Qulaajaasarneq

1. juli 2017 aallarnerfigalugu inatsisitigut piumasaqaataalerpoq piginnaangorsaaqqinnissaq sioqqullugu piginnaangorsaaqqittussat **tamarmik** qulaajaanermut peqataasassasut.

- Peqqussummi § 4 imm. 1

Suna siunertaava

Qulaajaanikkut inuup pineqartup qanoq sulisinnaassuseqarnera erseqqissisinnegartassaaq, sutigut ilinniaqqinneq ingerlanneqassanersoq, suut sammineqassanersut, ilinniagaqarnissaq, suliffeqarfimmi piginnaangorsarneq, eqaannerusumik sulineq imaluunniit siusinaartumik pensionisiaqalernissaq.

- Peqqussummi § 4 imm. 2

Sunik imaqarpa

Qulaajaaneg atuagarsornermik aamma assarsornermik imaqarpoq

Inatsimmi namminerimi imaluunniit inatsimmut nassuiaatini atuagarsornertaa sunik imaqassanersoq immikkut nassuiarneqanngilaq.

Atuagarsornertaa makkuninnga imaqartariaqarpoq

- Pisinnaatitaaffiit aamma pisussaaffiit pillugit atuartitsineq,
- Sumi inatsisit aamma malittarisassat atuuttut nassaarineqarsinnaaneri pillugit paasissutissiineq,
- Peqqissutsumut, tarnip pissusaanut, ilaqutariinnermut aamma inooqatigiinnermi ajornartorsiutinut tunngasuni sumi ikiortissarsisoqarsinnaanersoq pillugu paasissutissat nalinginnaasut,
- Suliffeqarnermi pissutsinut tunngasuni (assersuutigalugu akissarsiassanut, piffissamut suliffiusartumut, sulinngiffeqartarnermi malittarisassanut), ilisimasassat nalinginnaasut
- Inuiaqatigiinni piumasaqaatit nalinginnaasut (assersuutigalugu allagarsiassat digitaliusut, MitID),
- Suliffimmi pissusilersornerit akuerineqarsinnaasut (assersuutigalugu qaqugukku takkuttarnissaq aamma peqanngissinnaaneq, eqqiluisaarneq, ataqqinninneq, uninngalaartarneq, mobilip namminerisap qaqugu suliffiup nalaani atorsinnaanera).
- Suliffeqarfinnut takuniaasarneq kaammattuutigineqarpoq.
- Taakku saniatigut atuartitsineq kajumissaatinik ilaqartariaqarpoq kiisalu tarnikkut pissutsit inuunitsinnut qanoq sunniuttarnerinik qanorlu taakkuninnga allanngortitsisinnaanerput pitsanngorsaasinnaanerpullu pillugu atuartitsisoqartariaqarluni.

Saqqummiisunik avataaneersunik immikkut ilisimasalinnik aggersaasoqarsinnaavoq: soorlu aningaaserivimmi siunnersorti inuttut aningaasaqarneq pillugu oqaluttuartinneqarsinnaavoq, timimik sungiusaasoq/pillorissaasoq/arsaannermut sungiusaasoq/timigissartitsisartoq aalanerup peqqissutsitsinnut inuunerinnitsinnullu pingaassusianik oqaluttuartinneqarsinnaapput peqataasunullu tunniussaqlutik. Periarfissat suli amerlanerupput.

Qulaajaanerup sulinermit tunngasortaa sulinermik misiliinertut isigineqassaaq qaammatinillu pingasunit siviunerussanani. Piffissap taassuma iluani piginnaangorsakkap suliffimmi suliassanik isumaginnissinnaassusia paasineqarsinnaalertariaqarpoq.

Qulaajaanermut aningaasartuutit Piginnaangorsaaqqinneq pillugu Inatsisartut peqqussutaat pillugu Inatsisartut inatsisaata allanngortinneqarneratigut kommunimut isumagisassanngortinneqarput, aamma qulaajaanermut tunngasortaa 2017-imi.

- Piginnaanngorsaaqqinneq pillugu Inatsisartut peqqussutaat (10/2017) § 4, imm. 3.

Sulisinnaassuseq

Sulisinnaassuseq ima nassuiarneqartarpoq:

”Imminut pilersorsinnaanngornissamut isertitaqalernissaq siunertaralugu suliassat assigiinngitsut erseqqinnerusumik oqaatigisat isumaginissaannut suliffeqarnermi piumasqaatinik naammassinnissinnaanermut piginnaaneq.”

Innuttaasup nukissai, ineriartornissamut periarfissai, sapersarfii kiisalu mianersuuttariaqarfii, suliassani tamani takuneqarsinnaasariaqarput - piginnaanngorsaaqqinneq, eqaannerusumik sulisitsisoqarnissaa imaluunniit siusinaartumik pensionisiaqalernissap isummerfigineqarnissaa apeqquataatinnagu.

Sulisinnaassuseq qanoq nalilersorneqassava

Sulisinnaassuseq nalilersinnaajumallugu tallimat maluginiassavagut:

1. Pineqartup nammineq suliffeqarnermik qanoq isiginninnera

Suliffeqalertussatut imminut isigiva? Suliffeqarnermut utertinniarneqarnermini suliniuteqarnermik peqataanissamut piareersimava?

2. Ilinniarsimanikkut sulinikkullu piginnaaneri

Ilinniagaqarpa? Sunik pikkorissarsimava? Sunik misilittagaqarpa – allagartaqarpa allagartaqanngilaluunniit? Sunngiffimmi sulinermit misilittagaqarpa? (timersoqatigiiffimmi sungiusaasutut, sanalunnermut piginnaaneqarluarpa il.il.) Oqaatsitigut piginnaaneqarpa?

3. Inuttut piginnaanerit

Inuit akornanni qanoq ippa? Ilakkuminarpa? Namminersoruni iluarineruaa? Ilikkartikkuminarpa?

4. Aningaasaqarneq aamma attaveqarfiit

Pineqartup aningaasaqarnera qanoq ippa? Akiitsoqarpa? Pineqartoq ilaqutaqarpa, ikinnguteqarpa, ilisarimasaaqarpa tapersersuillutillu kaammattuisinnaasunik? Pineqartup illoqatai tamarmik suliffeqarpat imaluunniit ilinniakkamik ingerlatsippat? Pineqartup ineqarnera qanoq ippa?

5. Peqqissuseq

Pineqartup peqqissutsi nammineq qanoq oqaatigisarpa? Peqqinnissaqarfik qanoq oqarpa?

Tamatumunnga atatillugu eqqumaffigineqassaaq napparsimagaluaaraanniluunniit sulisinnaassusermik pigiinnarneqarsinnaammat. Inuk ataavartumik sulisinnaassuseerutinngikkaluarluni anigorsinnaanngisaminik napparsimarulussinnaavoq, (astma, inalukkani nappaatit ilaat, gigteqarnerit ilaat, sianiutini nappaatit ilaat allallu).

6. Nalilersuineq

Nalilersuinermit eqqumaffigisassat tallimat aallaavigalugit nalilersuisoqassaaq, pineqartup suliffeqassaguni piginnaasaanik sapersarfiinillu. Soorlu takuneqarsinnaasoq “peqqissuseq” sulisinnaassusermik nalilersuutit immikkoortut tallimat ilagiinnarpaat - aamma **sulisinnaassutsimik nalilersuineq nakorsamit nalilersuinerunngilaq.**

Inuussutissarsiorsinnaassutsimik aamma sulisinnaassutsimik naliliinerit assigiingissutaat *Inuussutissarsiorsinnaassuseq* - pillugu taaguuteqarneq ullumikkut sillimmasiisarnernut aamma taarsiisuteqarnissanut atatillugu inuussutissarsiorsinnaanermik annaasaqarsimaneq pillugu sillimmasiinerit nalilersorneqarnerini, soraarnerussutisiassanik suliaqarnerni aamma ajoqusersimanermut sillimmasiisutunik nalilersuinerni taamaallaat atorneqarnerusarpoq.

Inuussutissarsiorsinnaassutsimik annaasaqarneq naatsumik oqaatigalugu tassaavoq suliami ilinniagaqarfigisimasami imaluunniit kingullermik napaniutigisimasami sulisinnaassuseerullunilu imminut pilersorsinnaajunnaarsimassuseq.

Sulisinnaassuseq tassaavoq taaguuteqarneq nutaanusooq siammasinnerusorlu, tassuuna inuup imminut pilersorsinnaassaguni piginnaasai sapersarfiilu ataatsimut oqaatigineqarput.

Assersuut: Umiatsiaararsortoq ajutooreernermigut tuerlulersimasooq, inuussutissarsiorsinnaanermik annertuumik annaasaqassaaq, sulisinnaassusiali naliliivigineqarpat allanik suliffeqarsinnaasutut, soorlu biilertutut/pedelitut/allanilluunniit timikkut ilungersunanngitsunik suliffeqarsinnaasutut naliliivigineqarnissaa qularnassanani.

Sulisinnaassutsimik misiliineq

Sulisinnaassutsimik misiliineq tassaavoq inuup suliassanik aalajangersimasunik suliaqarsinnaassusianik naliliineq, makkunani

- suliassat pisariussusiisigut,
- assarsorsinnaassutsikkut,
- ilisimasassanik nutaanik ilikkagaqarsinnaassutsikkut imaluunniit suliassanik nutaanik ingerlatsisinnaassutsikkut,
- piffissamik suliffiusartumik aamma
- qasusuissutsimik.

Taamaammat sulisinnaassutsimik misiliineq tassaaginngilaq inuup sapaatip akunneranut nalunaaquttap akunnerini qassini sulisinnaassusianik misiliineq.

Sulisinnaassutsimik misiliineq suliffeqarfinnik assigiingiaartunik misileraatitsinerunngilaq.

2017-imi inatsisip ilallugu allanngortinneqarneratigut sulisinnaassutsimik misiliinermut aningaasartuutit kommuninut isumagisassanngortinneqarput.

Pilersuinerit tunngavigisat

Qulaajaanerup nalaani qulaajaaneq sioqqullugu pilersuinerit tunngavigisatut amerlatigisunik pisortanit pilersorneqarnissaaq pisinnaatitaaffigineqartarpoq.

- Peqqussummi § 4, imm. 3.

Kina qulaajaanermik ingerlatsisusinnaava

Tunngaviusumik kikkut tamarmik eqqortunik piginnaanillit kommunip qulaajaasitsineranik ingerlatsiniarlutik neqerooruteqarsinnaapput. Taamaattoq tamatigut piginnaanngorsaaqqinnermut peqqussummi imarisassaanut piumasaqaatit naammassineqartussaapput.

Namminersorlutik Oqartussat qulaajaanermut kommuninut najoqqutassaliorsimapput: Aqqutissiuineq kajumissaanerlu. Piginnaanngorsaaqqinnerup imarisassaanik peqqussummi piumasarineqartut naammassisinnaagunikkut kommunit namminersorlutik qulaajaanermik ingerlatsisinnaapput.

Piginnaanngorsaaqqinneq

Inuit pineqartut

Peqqussut: "Piginnaanngorsaaqqinnissamut ikiorserneqartassapput inuit peqqissutsimut tunngasut, inuttut atugarisanut tunngasut, tamatumani ilanngullugit sivisuumik suliffissaarusimaneq, sumiiffimmi pissutsinut tunngatillugu inuttut ilaqutariittulluunniit artorsaateqarnerit pissutigalugit imaaliillaannarlugit sulilernissamut naleqqussarneqarsinnaanngitsut imaluunniit naleqqussaaqqinneqarsinnaanngitsut. Inuk ikiorserneqarsinnaatitaasoq taaneqartarpoq piginnaanngorsaaqqittussa."

- Peqqussummi § 2, imm. 1

Siunertaq

Peqqussut: "Piginnaanngorsaaqqinnerup siunertaraa inuup sulisinnaassusilittut ukioqartup killilimilli sulisinnaassuseqalersimasup suliinnarnissaanut sulilernissaanulluunniit ikiuinissaq, taamaaliornikkut pineqartup imminut ilaqtutaminullu pilersuisinnaassusia pitsaanerulersinniarlugu."

- Peqqussummi § 1

Inuit pineqartut pillugit peqqussutip oqaasertai allanngortinneqanngillat, taamaammat inuussutissarsiorsinnaassuseq sulisinnaassusinngorlugu allanngortinneqarsimangilaq. Kisianni piginnaanngorsaaqqinnissaq isumaliutigineqarpat atorneqarpalluunniit sulisinnaassuseq aallaavineqassaaq, tak.

- Peqqummi § 4

Sulisinnaassutsip killeqarnera

Inuup sulisinnaassusia qulaajarneqassappat taassuma timikkut, tarnikkut inooqatigiinnikkullu nukissai sapersarfiilu allaaserineqassapput. Tamatumuunakkut suliffeqalernissamut qanoq qanitsiginera erseqqississaaq kiisalu suliffeqalernissamut qaninnerulersinniarlugu ikiorsertariaqassusia erseqqississalluni.

Assersuut: Qiterlunneq sulisinnaassusermik killiliisinnaavoq. Suliffimmi oqimaatsuleriffiunngitsumut nuutitsineq immaqa naammassinnaavoq. Atortorissaarutit (nerrivik appartartoq, kivittaatit, nerriviit assakaasullit allalluunniit) immaqa aaqqiissutigineqarsinnaapput. Immaqa suliamut allamut ilinniaqqinnissaq pisariaqarsinnaavoq.

Assersuut: Uippakajaarneq katsorsarneqartoq, nakorsalli inassutigippagu uippakajaarnartunik suliaqassanngitsoq, sulisinnaassutsimik killiliisuusarpoq. Maanna suliffigisami suliasanut allanut nuunneqarsinnaaneq periarfissaanerluni? Suliffigisamik namminermik imaluunniit suleriaatsinik namminernik allannguneq naammassinnaanerluni? Imaluunniit allamik suliaqalernissamut ilinniaqqinnissaq pisariaqarpa?

Assersuut: Sivisuumik suliffissaaleqineq sulisinnaassutsimik annikinnerulersitsisinnaavoq. Sivisuumik suliffissaaleqinerup inuit assigiinngitsunik sunnertarpei, inuusuttorli utoqqaanerusunut sanilliullugu eqqugaanerusarpoq. Pineqartup sivisuumik suliffeqanngereerluni inuit akornanniinnissaminik ajornakusoortitsisinaanera ataqqillugu kigaatumik suliffeqarnermut iseriartuaartitsineq aqutissaasinnaavoq. Utoqqaassuseq

apeqqutaatinnagu inuit ilaasa ulluinnarni allanut attaveqarluarsimangikkaangamik suliffeqannginnertik assorsuaq kiserliornartutut misigisimasarpaat.

Assersuut: Inuttut oqimaatsunik atugaqarneq sulisinnaassutsimik killiliisuusarpoq. Inuttut oqimaatsunik atugaqarneq aamma tassaasinnaavoq inissiami mikivallaami amerlasuunik ineqateqarneq, inuit inersimasut arlaqartut piffissami sivisuumi suliffissaaleqisuusimasut illoqatigiinneri, ilaqutariinni inuup inuilluunniit arlaqartut aanngajaarniutininik atuivallaartuuneri, ilaqutariit ilaata pineqaatissinneqarsimasunik inissiisarfimmut inissinneqarsimasuunera, meeqqap meeqqalluunniit arlaqartut imaluunniit inuusuttuaqqat angerlarsimaffiup avataani inissinneqarsimasuuneri.

Suliffeqarnermut utertitsiniarluni tapersersuineq pillugu neqeroorut sunaluunniit iluatsissinnaassappat suleqatigiinneq kiisalu isumaginnittoqarfimmiit ilaqutariinnut ikiorsiissutit eqqarsaatigalugit ataqatigiissaarineq pinngitsoorneqarsinnaanngillat.

Nammineq peqataanissaq

Inuk nammineerluni piginnaanngorsaaqqinnissamik qinnuteqartoq, imaluunniit inuk qulaajaavigineqarnissamut innersuunneqartoq, tamatumalu kingorna piginnaanngorsaaqqinnermut ingerlaqqittoq nammineq pilluni suliap qulaajarneqarneranut peqataassalluni taamalu atukkaminik nassuaanissamut pisussaaffeqarpoq.

- Peqqussummi § 2, imm. 2

Kajumissuseq

Inuk kajumissuseqarluarpat, piginnaanngorsaaqqinneq iluatsilluarnerusarpoq. Sullinneqartutut misigineq, periarfissanik takunnissinnaassuseq, aamma qaninnerusumi ungasinnerusumilu siunertanik takunnissinnaassuseq kajumissusermut ilaatigut apequtaasarput.

Piginnaanngorsaaqqinnerit tamarmik inuussutissarsiulernissamik siunnerfeqassapput, pisariaqarneranillu sivisunerussanatik. Tamanna anguniarlugu pineqartup piginnaasai tunngavigalugit kissaataasa sapinngisamik naammassiniarneqartarnissaat kajumissusermut pingaaruteqartarpoq.

Inuussutissarsiulernissaq siunnerfigineqarpat neqeroorut suliffeqarnermi tapersersugaanngitsumi imminut pilersulernissamut aqutaasinnaasariaqarpoq. Taamaammat pikkorissaanerit allallu sunngiffimmi sammisanut inuttulluunniit soqutigisanut assingusut piginnaanngorsaaqqinnermut malittarisassat naapertorlugit tapersersorneqarsinnaanngillat – aamma inuunerinnerulernissamik kinguneqassagaluarpataluunniit.

- Peqqussummi § 5

Innuttaasup peqataatinneqarnera

Pineqartoq peqataatikkumallugu taamalu imminut pilersortunngortitsiniarluni ikiorsiinnermut akisussaaqataatikkumallugu, tamannami pissusissamisoorpat, sullissisoq assigiinngitsunik iliuuseqarsinnaavoq.

Amerlanerpaat piginnaanngorsaaneq sioqqullugu iliuusissatut pilersaarusiortifigineqareersimasussaapput, tassanilu inuttaa inissisimaffigisaminik ingerlariaqqissinnaassaguni kissaatiminik pisariaqartitaminillu nassuaalluarnepaajusussaavoq. Piginnaanngorsaaqqinnermut pilersaarusiortoqalertillugu akuutinneqarneq peqataanerlu taama ittut aamma pisariaqarput.

Piginnaangorsaaqqittoq iliuusissanut pilersaarummut qanoq ittumulluunniit atsioqataasassaaq – aamma piginnaangorsaanissamut pilersaarummut.

Piginnaangorsaaqqinnerup ingerlanneqarnerani inuk qitiulluinnartoq soorunami tassaavoq piginnaangorsaaqqittoq nammineq, taavalu kommunimut inummullu namminerumut pisussaaffiliisumik isumaqatigiissusiortoqarnera inuttaanut erseqqissarumallugu atsiornermigut akisussaaqataanerminik ersersitsinissaa pingaaruteqarluinnarpoq.

Piginnaangorsaaqqinneq sunik imaqarsinnaava

Oqaatigineqareersutut suliffeqalernissamut qaninnerulersitsinissaa siunertaralugu piginnaangorsaanerup inuussutissarsiornermut sammitinneqarnissaa piumasaaqataavoq.

Piginnaangorsaaqqiineq tassaasinnaavoq inuussutissarsiorsinnaanermut piukkunnarsaaneq (ataaniittut takukkit), suliffeqarfimmi piginnaangorsagaaneq, ilinniartitaaneq imaluunniit nutaamik allamik ilinniagaqarneq.

- Peqqussummi § 6

Qulaajaaneq aamma suliffimmi misiliineq qulaajaanermik ingerlataqarnermi pisarput, piginnaangorsaaqqinneq sioqqullugu ingerlanneqartartut. Qulaajaasarneq pillugu immikkoortoq immikkut takuuk.

Inuussutissarsiorsinnaanermik inerisaalluni suliniutit

Inuttut ineriartorneq pillugu pikkorissartarneq inuit ilaannut tassaasinnaavoq inuussutissarsiornermut piukkunnarsarneq naleqquttoq. Taamatut ingerlatsinermi piginnaangorsaaqqinnermut ikiorsiissutit tunniunneqartarput.

Inuttut unammilligassat piginnaangorsaaqqittariaqalernermut pissutaappata taakku suliariniarlugit inuussutissarsiornermut piukkunnarsaanermi piginnaangorsartoq inuttut ineriartorneqarnermut pikkorissarneqarnermut peqataasariaqarsinnaavoq. Aamma piginnaangorsartoq atorfittaarsinnaassappat biilernerumut allagartartaarnissaanut aningaasartuutit matussuserneqarnissaat pineqarsinnaavoq. Inuttut unammilligassat assigiinngitsuusinnaammata inuussutissarsiornermut piukkunnarsarneqarnermi inuttut ineriartornissamut neqeroorutit assigiinngitsuusinnaapput.

Ilinniagaqarneq

Ilinniagaqarneq piginnaangorsaaqqinnermut ilaappat piginnaangorsaaqqinnermi ikiorsiissutit pilersuinerumut tunngavigineqassapput. Nalunaaquttap akunneri atuarfiusut, piareersarfiusut / ilinniagassaleriffiusut piginnaangorsaaqqinnermut pisartagaqaatigineqassapput. Angerlarsimaffimmi suliat sapaatit akunnerannut nalunaarusiortariaqanngillat, ilinniarfimmi aqutissiuisup nalunaaquttap akunneri atuarfiusut saniatigut piffissamik atuineq missiliuussinnaavaa. Malitseqartitsinerit akornanni missiliuussineq taanna aallaavigineqartassaaq.

Qaffasinnerpaamik sapatip akunneranut nalunaaquttap akunnerinut 40-nut piginnaangorsaaqqinnermut ikiorsiissutinik tiguisoqarsinnaavoq.

- Namminersornerullutik Oqartussat nalunaarutaanni nr. 40, ulloq 13. december 2001-imeersumi § 6, imm. 2

Piginnaangorsaaqqinnissamut pilersaarut aamma piginnaangorsaaqqinnissamut isumaqatigiissut

Piginnaangorsaaqqinnissamut *pilersaarut* innuttaasup pineqartup aamma kommunip akornanni suliaavoq.

Piginnaangorsaaqqinnissamut *isumaqatigiissut* innuttaasup, kommunip aamma sulisitsisup akornanni suliaavoq.

Piginnaangorsaaqqinnissamut pilersaarut ingerlataqarnissaq sioqqullugu suliarineqartarpoq, pineqartullu sulileqqinnissaanut pisariaqarsorineqartunik piviusorsiortunillu imaqassalluni. Piffissaliussat pilersaarummi oqaatigineqassapput.

Suliffeqarfimmi piginnaangorsaaqqinneq pineqarpat, akissarsianut tapiissutinut takussutissiaq pilersaarummi aamma ilaassaaq. Taamaalilluni takuneqarsinnaassaaq qaqugukkut akissarsianut tapiissutit apparneqartussaaneri.

Soorunami inuk naatsorsuutigisaraluamit unammilligassaqarnerusinnaavoq, akissarsianullu tapiissutit sivitsorneqarnissaat isummerfigisariaqalersinnaalluni. Taama pisoqassappat piginnaangorsaaqqinnermut *isumaqatigiissut* nutarterneqassaaq, attuumassuteqartullu tamarmik isumaqatigiissummik nutaamik atsiussallutik.

Piginnaangorsaaqqinnermut isumaqatigiissummi ersittariaqarpoq qanoq akulikitsigisumik malitseqartitsisoqartassanersoq, kina ataatsimiinnissanut suliassamik aallartitsisassanersoq, pisariaqassappat suliffeqarfiup kina saaffigisassaneraa aamma suliffeqarfimmi kina attaveqaataanersoq pillugu paasisutissaqassalluni.

- Peqqussummi § 11
- Namminersorerullutik Oqartussat nalunaarutaat nr. 40, ulloq 13. december 2001-imeersoq.

Sivisussusia

Piginnaangorsaaqqinneq sapinngisamik sivikinnerpaajussaaq, ukiullu marluk sinnerlugit sivisussuseqarsinnaanani.

Nalinginnaasumik inuup suliffeqanggissimanagera sivitsoriartorlugu piginnaangorsaaqqinneq sivitsoriartussaaq. Ukiuni marlunni suliffeqarfimmi piginnaangorsaaqqinnissaq kikkunnut tamanut imaaliinnarluni pisinnaatitaaffiunngilaq.

Immikkut pisoqartillugu piginnaangorsaaqaneq ukiut 2-it sinnerlugit sivitsorneqarsinnaasarpoq, assersuutigalugu erninermi imaluunniit sivisunerusumik napparsimanermi.

- Peqqussummi § 10

Malitseqartitsineq

Peqataatitsineq kajumissaanerlu pillugit immikkoortumi oqaatigineqartutut piginnaangorsaaqqittup sapinngisamik annerpaamik peqataatinneqarnissaa pingaaruteqarluinnarpoq. Piginnaangorsaaqqinneq unittuussangippat pissutsit piginnaangorsaaqqinnermut pitsaanngitsumik sunniuteqartut piaarnerpaamik aaqqinneqarnissaat pingaaruteqarluinnarpoq.

Suliassiisutaasimasut artornarpallaartutut isikkoqarpata, Suliassat oqimaappallaarpata,

Piffissat suliffiusussat inuup atugaanut allanut atatillugu ataqatigiissikkuminaappata, suliaassissutaasut peqqiilliuutaasunik ajornerulersitsippata, aaqqiagiinngittoqarpat, paatsooqatigiittoqartarpat, imaluunniit aaqqiagiinngissutaasut ajornartorsiutaalerpata – taava tamakkua aaqqikkuminarnerusarput siusissukkut iliuuseqarfigineqarunik.

Malitseqartitsisarneq pillugu isumaqatigiissutit aalajangersimasut piginnaanngorsaqqittumut suliffeqarfimmullu toqqissisimatitsisarput. Taava illuatungeriit nalusanngilaat ajornartorsiutaasinnaasut piffissami aalajangersimasumi oqaloqatigiissutigineqarsinnaasut.

Ataatsimiinnerit malitseqartitsiviusut piginnaanngorsartup tapersersorneqarnissaanut nersorneqarnissaanullu periarfissatsialaasarput – paarlattuanilluunniit inummut ajornartorsiumminik qaangiiniartumut taama takutitsivissaqqittarlutik.

Piginnaanngorsaqqinnerup qanoq akulikitsigisumik malitseqartinneqartarnissaanik peqqussut immikkut piumasaaqatitaqanngilaq.

[Suliffeqarfiup aaqqissuunneqarnera aamma sullisit il.il.](#)

Suliffeqarfimmi piginnaanngorsaanermut atatillugu iluaqusersuutininik pisariaqartitsisoqarpat (kranimik kivitsissummik, nerriveeqqamik assakaasulimmik, qullermik allanillu), taava tamatumunnga ikiorsiissuteqartoqarsinnaavoq. Tamanna aamma atuuppoq sullisinut suliffeqarfimmit tunniunneqartanngitsunut, assersuutigalugu kamippannut sillimaniarnermut atortorissaarutaasunut.

Biilernerumut allagartaqarnissaq piginnaanngorsaaqqinnermik suliffiusumi pineqartumi *pisariaqarpat*, biilernerumut allagartaarnissamut aningaasaliisoqarsinnaavoq.

Piginnaanngorsaqqittunut ilinniagaqarnermik ingerlatsisunut, pikkorissarnerumut akiliinissamut, atuakkanut, atuagaasivimmu assigisaanullu aningaasaliisoqarsinnaavoq.

Piginnaanngorsaaqqinnerup naammassillugu ingerlanneqarnissaanut *aningaasartuutininut pisariaqartunut ataasiartumik* ikiorsiissuteqartoqarsinnaavoq.

- Peqqussummi § 13, imm. 2

Katsorsaanermut aningaasartuutininut akiliutit tassaanngillat pisariaqartunut ataasiartumik aningaasartuutit, piginnaanngorsaaqqinnerumut malittarisassat naapertorlugit akilerneqarsinnaasut. Katsorsaanermut aningaasartuutit peqqissutsimut aamma/imaluunniit isumaginninnerumut tunngasuupput.

Piginnaanngorsaaqqinnerumut atatillugu iluaqusersuutininut pisariaqartunut aningaasartuutit kommunit aamma Namminersorlutik Oqartussat akornanni avinneqartarput.

[Suliffeqarfinni piginnaanngorsaaqqinnermik akissarsianut tapiissutit](#)

Suliffeqarfimmi piginnaanngorsaaqqinnermi kommune aamma Namminersorlutik Oqartussat suliffeqarfimmut akissarsianik aningaasartuutininut tapiissuteqartarput - pisortat suliffiutaannut aamma namminersortut suliffiutaannut - 20-80 %-illu akornanni annertussuseqartarlutik. Suliffeqarfinnut tapiissutit aallaqqaammut qaffasittarput, piginnaanngorsaqqittulli piginnaaneqaleriartornera sulisinnaaneruleriartorneralu peqatigalugit appariartortinneqartarlutik. Akissarsianut tapiissutini ersersinneqassaaq piginnaanngorsartup sulisinnaassusia, piginnaanngorsartup suliai akissarsianut tapiissutininut naapertuutissallutik.

- Namminersornerullutik Oqartussat nalunaarutaanni nr. 40, ulloq 13. december 2001-imeersumi § 1

Suliffeqarfimmi piginnaangorsaqqittoq suliffimmi pineqartumi akissarsiat pillugit kattuffiit isumaqatigiissutaat naapertorlugu akissarsiaqartinneqassaaq.

- Peqqussummi § 8

Suliffeqarfimmi suliarineqartunut atatillugu akissarsiaqartitsisoqartarpoq, piginnaangorsaqqittup siusinnerusukkut ilinniagarisimasaanut pinnani.

Assersuut: Inuk ilinniartitsisutut ilinniarsimasoq napparsimmaviup igaffiani ikiortitut piginnaangorsarpoq. Taanna igaffimmi tassani assistentitulli allatut akissarsiaqartinneqassaaq.

Assersuut: Qalipaasutut ilinniarsimasoq suliffeqarfimmi piginnaangorsartoq bussinik aquttutut sulisinnerarpoq. Taanna bussinik ingerlatitsisartutulli allatut akissarsiaqartinneqassaaq.

Akissarsianut tapiissutit inuussutissarsiutinut tapiissutaanngillat, kisianni siullerpaamik inuit unammilligassaqartut suliffeqaleqqinnissaat pillugu ikiorserneqarnissaannut periarfissaalluni. Akissarsianut tapiissutit piginnaangorsartup sulisutut nalinginnaasutut aallaqqaammut sulisinnaassuseqannginnera pissutigalugu suliffeqarfimmut matussutissaapput.

Pisortat namminersortullu suliffeqarfiutaat nuna tamakkerlugu sulisunik piginnaasalinnik amigaateqarput. Piginnaangorsartumik suliffeqarfimmi piginnaangorsartitsineq suliffeqarfiup nammineq inuiaqatigiinnut pisussaaffiinik (CSR) naammassinninneruvoq aamma siunissamut iluaqutissatut iliornerulluni. Suliffeqarfimmi piginnaangorsaanikkut suliffeqarfiit piginnaasanut sulianullu pisariaqartitaminnut sulisumik ilinniartitsinermut tapiiffigineqarsinnaapput.

CSR suliffeqarfiup suliamik ingerlatsinermi attuumassuteqarfigisaminillu suleqateqarnermini inuit atugaannut avatangiisinullu tunngasunik isiginiagaqartarnerannut taaguutaavoq. Kalaallisut inuiaqatigiinnut akisussaaqataanermik taagorneqartarpoq.

Suliffeqarfiit inuiaqatigiinni akisussaaaffimminnik takutitsisarput, suliffeqarfimmut aamma inuiaqatigiinnut naleqarnerulersitsisarlutik, soqutigisaqartut peqatigisatik isumasioqatigisarlugit, inooqatigiinnikkut, avatangiisitigut aamma ileqqorissaarnikkut unammilligassat suliarineqartarnerini, nunat tamalaat akornanni ileqqut akuerisaasut inuiaqatigiinni akisussaaqataanermut tunngavigalugit (Inuiaqatigiinni akisussaaqataanermut siunnersuisoqatigiit / Rådet for Samfundsansvar, 2010).

Akissarsianut tapiissutit suliffeqarfimmut tunissutitut eqqarsaataanngillat. Suliffeqarfinni piginnaangorsaaqqittarnerup aamma akissarsianut tapiissuteqartarnerup isumagaa suliffeqarfiit inunnik piginnaangorsaaqqittariaqartunik piginnaangorsareernikkut atorfinitsitsisarnissaat: suliffeqarfik tapiiffigineqarpoq inummik sungiusaanissamut, suliffeqarfimmi pineqartumi suliassanut aalajangersimasunut tunngatillugu sulisitsinissamut.

Piginnaangorsaanerup aallartinneraniilli suliffeqarfik qanorluunniit pisoqaralarpat piginnaangorsartumik atorfinitsitsilersaarani nalunaarpat suliffeqarfimmik piginnaangorsaanerup tamanut naammagintumik ingerlanera apeqqutaatillugu atorfinitsitsilersaartumik ujarlertoqartariaqarpoq.

Paasissutissanik ingerlatitseqqittarneq

Sunik peqquteqarnerusumik ilisimaneqanngitsumik siusinnerusukkut ileqqusimavoq kommunip SIK-mik ilisimatitsisarnera suliffeqarfinni piginnaanngorsaaqqiinernik ingerlatsisoqaraangat.

Ileqqoq taanna suli unitsinneqarsimanngippat, ingerlaannaq maannakkut unitsittariaqarpoq.

Innuttaasut ataasiakkaat pillugit kattuffinnut ilisimatitsisarnermut kommune peqataasinnaangilaq. Sulianut, soorlu suliffeqarfimmi piginnaanngorsaanermut, kattuffiit attuumassuteqanngillat, taamaattumillu ilisimatinneqarnissaminnik pisinnaatitaaffeqarnatik.

Piginnaanngorsaaqqittup imaluunniit eqaannerusumik suliffeqartup sulinermik inuussutissarsiuteqartut kattuffiat ilaasortaaffigisani paasissutissinniarpagu tamanna nammineq suliassaraa.

Ilanngullugit eqqumaffigisigit pisortanik suliassanik suliarinnittarnerannut inatsit naapertorlugu nipangiussisussaataaneq, aamma Inunnut paasissutissat pillugit inatsit naapertorlugu paasissutissanik ingerlatitseqqissinnaaneq.

Neqeroorutit aamma pilersuineq, takussutissat

<i>Ingerlatat</i>	<i>Pilersuineq</i>	<i>Suliffeqarfiup isumagisassaa</i>	<i>Aningaasalersuineq</i>
Qulaajaanermik ingerlatsineq (suliffimmi misiliineq ilanngullugu)	Maannamut pilersuinertut	Akeqanngilaq	Kommuni
Suliffeqarfimmi piginnaanngorsaaqqinneq	Isumaqaatigiissut naapertorlugu *	20 – 80% (Utertinneqartussat piginnaanngorsaaqqinnerup ingerlanerani allannguuteqassapput)	Kommuni/ Namminersorlutik Oqartussat / Suliffeqarfik
Ilinniagaqarneq	SIK ilinniagaqanngitsunut nal.ak. 70% #	-	Kommuni / Namminersorlutik Oqartussat
Eqaannerusumik suliffeqarneq	Isumaqaatigiissut naapertorlugu *	Minnerpaamik 50%	Suliffeqarfik/kommuni/ Nam. Oqartussat

*) Pisartakkani aapparisaq isertitai apeqqutaanngillat

#) Piginnaanngorsaaqqinnermi pisartakkat ilinniarsimangitsut SIK naapertorlugu akunnermusiaasa 70%-inik amerlassuseqarput (§ 6, Namminersornerullutik Oqartussat nalunaarutaat nr. 40, ulloq 13. december 2001)

Sulinngiffeqarneq

Suliffeqarnermi piginnaanngorsagaanermi suliffeqartutut allatulli sulinngiffeqarnissamut sulinngiffeqarnerisutisiassanullu katersisoqartarpoq.

Eqaannerusumik sulineq

Peqqussut: "Atugassarititani nalinginnaasuni qulaajaaniarluni ingerlassap nalaani, imaluunniit piginnaanngorsaanermik suliaqarnerup kingornatigut pineqartoq suliffimmik pissarsinissamik imaluunniit attassinissamik angusaqarsinnaanngitsoq paasineqarpat inuk eqaannerusumik suliffeqalersillugu atorfinitsinneqarsinnaavoq."

- Peqqussummi § 15, imm. 1

Eqaannerusumik sulineq tassaavoq inunnut sulinermut annertuumik piginnaanikillimasunik, piginnaanikillinertik pissutigalugu allatut suliffeqarsinnaajunnaarsimasunik, atorfeqartitseriaaseq.

Eqaannerusumik suliffeqartitsinerni tamani inuit ataasiakkaat sanngiiffii eqqarsaatigineqartariaqarput, taakkulu eqaannerusumik sulineq pillugu isumaqatigiisummi erseqqissumik oqaatineqarsimassapput nassuiarneqarlutillu. Sanngiiffiit eqqarsaatigisariaqarnerat pillugu immikkoortoq takuuk.

Eqaannerusumik suliffeqartinneqartoq nalinginnaasunik isumaqatigiissutit naapertorlugit akissarsiaqartinneqartarpoq, sulisitsisorlu akissarsianut tapiissutisarluni. Ersarinnerusumik ataaniittut takukkit.

[Inuit pineqartut](#)

Eqaannerusumik suliffeqartitsineq taamaallaat inunnut annertuumik sulisinnaassusikillisuunut atuuppoq.

Sulinermut piginnaanngorsaanerme periarfissat aatsaat tamakkeqqaarlugit eqaannerusumik suliffeqartitsisoqartarnissaa siusinnerusukkut piumasaqaataasaraluarpoq. 2017-imi aasaanerani inatsimmik allanngortitsinermut atatillugu piumasaqaatinik qasukkaasoqarpoq. Taamaattoq suli piumasaqaataavoq sulisinnaassuseq isummerfigineqariissassasoq, tassunga ilanngullugu inuup pineqartup tapiissutitaqanngitsumik suliffissami sulisinneqarsinnaannginnera nalilersorneqassasoq. Naliliinermi tamatumani aallaaviusariaqartassaaq minnerpaamik piginnaanngorsaaqqinnermik ataatsimik pineqartumut ingerlatsisoqareersimassasoq.

[Tamakkiisumik affarmilluunniit aningaasaliissuteqarneq](#)

Inuup eqaannerusumik suliffeqarnissaa isummerfigineqareerpat sulisinnaassuseq appanngikkallarmat qanoq atorfeqarsimanera qiviarneqassaaq.

Assersuutit:

Inuk piffissap ilaannaani sulisarsimasoq, aamma piffissap ilaannaani eqaannerusumik sulisarnissamik taamaallaat pisinnaatitaaffeqassaaq.

Inuk piffissaq tamaat sulisarsimasoq, ulloq naallugu eqaannerusumik suliffeqarnissamut pisinnaatitaassaaq.

Suliffeqarnerup qanoq ittuusimanerata immikkoortinneqarneranut pissutaasoq tassaavoq inuk piffissap ilaannaa sulisarsimasoq eqaannerusumik sulilernermini marloriaammik isertitaqaleriataarsinneqassanngimmat.

- Namminersornerullutik Oqartussat nalunaarutaat nr. 40, ulloq 13. december 2001-imeersumi § 9, imm 2: Piffissaq tamakkerlugu eqaannerusumik suliffeqarnissamik kommuni neqerooruteqartussaataavoq, atorfeqartup piffissap ilaannaani atorfeqartitaanissani piumanerunngippagu.

[Qajassuussineq / Qajassuunneqarnissamik pisariaqartitsineq](#)

Qajassuussinissaq pisariaqanngippat eqaannerusumik suliffeqalersitsinissamut tunngavissaqanngilaq.

Qajassuussineq piffissap suliffiusussap sivisussusianiissinnaavoq.

Assersuutit:

Inuk pineqartoq gigerluni anniartarnini pissutigalugu sulineq aallartivitsinnagu sukkaatsunnguamik aallarniisarnissamik pisariaqartitsisinnaavoq. Qajassuussineq tassaasinnaavoq ullup suliffiusussap nal. 12 aallartittarnera.

Alla ullup ingerlanerani annialeriartortarsinnaavoq, taamalu ulloq suliffiusoq nal. 13 soraartariaqartassalluni.

Allap anniartarnera ullormiit ullormut allanngorarsinnaavoq, taamalu ullup suliffiusussap qassinut aallartinnissaa aalajangersimasuussanngilaq, takkuffiusartorlu pisariaqartitsineq naapertorlugu allanngorarsinnaassalluni.

Qajassuussinissamik pisariaqartitsineq tassaasinnaavoq avatangiisinik eqqissisimasunik pisariaqartitsineq.

Aamma qajassuussinissamik pisariaqartitsineq tassaasinnaavoq anniartarneq ajornerulersikkumanagu pineqartup oqimaatsunik, timimut artornartunik suliaqartitaannginnissaa – ajornanngippat suussusii erseqqissumik taasanik.

Qajassuunneqarnissamik pisariaqartitsineq tassaasinnaavoq aamma pineqartup arriitsunnguamik sulisarnera.

Piffissaq suliffiususaaq

Tamakkiisumik eqaannerusumik sulisarnissamik akuerisaasimaguni pineqartoq tamakkiisunik akissarsiaqartinneqassaaq (sapaatip akunneranut nalunaaquttap akunnerinut 40-nut) naak taamaallaat nalunaaquttap akunnerini 25-ini sapaatip akunneranut sulisaraluarluni.

Pissutaasoq: Oqaatigineqareersutut eqaannerusumik suliffeqartitsisoqassappat qajassuussinissaaq pisariaqartinneqartariaqarpoq. Qajassuussinissaaq pisariaqanngippat pineqartoq suliffimmi nalinginnaasumi sulisinnaasimassaaq. Qajassuussisariaqarneq tassaasinnaavoq sivikinnerusumik sulisinneqarneq (sulisinnaassutsip apparsimanagera pissutigalugu).

Assersuut: Inuit marluk eqaannerusumik sulisartut suliaat assigiipput. Aappaata suliassani nalunaaquttap akunneri sisamat iluanni naammassisarpai, tamatumalu kingorna soraartariaqarluni anniaateqarnini qasusarniniluunniit pissutigalugit. Inuup aappaata suliassat taakkorpiat nalunaaquttap akunneri arfineq-pingasut atorlugit sularisariaqartarpai, anniartarami imaluunniit qasusoortarami, akornatigullu qasuersaartariaqartarluni.

Taakkua marluk tamakkiisumik nalunaaquttap akunnerinut 40-nut sapaatip akunneranut akissarsisassapput, tamakkiisumik akilerneqartarnissamut akuerisaasimagunik.

Pineqartoq ullup affaanaa eqaannerusumik sulinissamut akuerisaasimaguni nalunaaquttap akunneri suliffigisani kisiisa akissarsisutigissavai.

Suliassat isumagineqartussat

Eqaannerusumik sulisup suliassai eqaannerusumik sulineq pillugu isumaqatigiisummi allassimapput attuumassuteqartut tamarmik qajassuussisariaqassutsimik paasinnilluarsimanissaat qularnaarumallugu.

Eqaannerusumik sulineq pillugu isumaqatigiisutip malitseqartinneqarnerani makku isummerfigineqartassapput

- suliassat suussusii allanngortittariaqarnersut

- kingullermerniit nutaanik qajassuussassaqarpa imaluunniit qajassuussisariaqarneq allanngorpa,
- qajassuuttariaqakkat ilaat pisariaaruppat kiisalu
- suliassatut isumaqatigiissutaasut nutarternissaat pisariaqarpa?

Pilersuineq – nalunaaquttap akunnermusiaqarneq naleqqutinngilaq

Eqaannerusumik sulineq inunnut annertuumik sulisinnaassusikillimasunut tamakkiisumilli pilersuineramik tunngavissaqartariaqartumut aalajangersimasumik pilersuinissamik neqeroorutaavoq.

Eqaannerusumik suliffeqarnissamut isumaqatigiissuteqartoqaraangat pingaaruteqarpoq isumaliutigisassallugu atorfeqarnermi atugassarititaasussat qanoq aqqissuunneqarnissaat. Pineqartoq akunnermusiaqarluni eqaannerusumik suliffeqarnissamik neqeroorfigineqarpat, isumaqatigiissut pilersuinissamut naammangilluinnartoq paasinarsinnaavoq. Inuk taanna akunnermusiaqaruni napparsimanermini akissarsiassaqaassanngilaq, tamannalu eqaannerusumik suliffeqartitaasut amerlanerit, peqqiilliornerit pillugu amerlanertigut taama suliffeqartitaasarmata, ajornartorsiuleratarsinnaanerit qaninnerusaaq.

Tamatununga atatillugu eqqaaneqassaaq sulisitsisoq akissarsiat affaat angullugit tapiiffiqineqartarmat, taamaattumillu aningaasartuut ikinnerulluni imaluunniit "ajutoorfissaqannginnerulluni" nalinginnaasumik atorfinittartunut sanilliullugu, napparsimanernut imaluunniit ilaannikkut sukkaannerusumik suliassat suliarineqartarnerinut atatillugu.

Aamma takukkit immikkoortut qajassuussinissamut kiisalu sulisitsisup taartisiassaanut tunngasut.

Napparsimanerup nalaani suliffissarsiortunut ikiorsiissutinik pinsinnaanngilaq

Eqaannerusumik sulisitaasoq napparsimanermini suliffissarsiortunut ikiorsiissutinik tigusisarsinnaanngilaq, inuk pineqartoq piffissaq tamakkerlugu suliffeqarnissaminut piareersimasuusannimmatt (taamaattumik pineqartoq piffissap ilaannaani sulisartussatut aningaasaliiffiqineqartarpoq).

- Suliffissarsiortunut ikiorsiissutit pillugit Inatsisartut inatsisaat: § 1. Suliffissaaleqisutut sulileriaannaasutut isigineqassaaq inuk suliffeqalernissaminut piareersimasooq, siumoortumillu immikkut suliniuteqarfigineqaqqaarani sapaatip akunneranut minnerpaamik akunnerni 20-ini suliffeqalersinnaasoq.

"Malittarisassaq nutaaq"

2017-ip aasaani inatsisip allanngortinneqarnerata kingunerisaanik inuk suliffeqarfimmi atorfeqartoq *tassanngaannartumik* sulisinnaassutsimi ilaanik (annertuumik) annaasaqartoq atorfeqaannassaguni sulisitsisuni peqatigalugu eqaannerusumik sulisarnissamut aningaasaliisoqarnissaanik qinnuteqartassaaq. Periarfissaq taanna inunnut suliffeqaratik pisortanit tamakkiisumik pilersortariaqaleratarsinnaasunik sulisitsiinnarnissamut atugassiaavoq.

- Peqqussummi § 15, imm. 2

Tassanngaannartooq oqaatigineqarneratut paasineqartussaavoq.

Eqaannerusumik suliffeqarsinnaanermut periarfissamik nutaamik akuersisoqartinnagu sulisinnaassusermik qajassuussisariaqarnerullu annertussusianik naliliinisaq suli piumasaqaataavoq.

Innuttaasut § 15 malillugu eqaannerusumik suliffeqartinneqalartut, Majoriap aqqissuuttangaanut qulaajaarnermut peqataanissaannik imaluunniit kingusinnerusukkut qulaajaanermut peqataanissaannik neqeroorfigineqartassapput.

Sulisinnaassutimik nalilersuineq

Takuuk Piginnaangorsaaqqittarneq pillugu immikkoortoq.

Minnerpaamik akuliunneq

Piginnaangorsaaqqittarnermut malittarisassat malillugit neqeroorutit tamarmik - aamma eqaannerusumik sulisarneq – tassaassapput aqqissuussinerit minnerpaamik akuliunnikkut pisartussat. Tassa imaappoq, sinnilinnik ikiorsiissuteqartoqaranilu pisariaqartinneqarnera sinnerlugu ikiorsiisoqartassanngilaq. Piginnaangorsaaqqinneq sapinngisamik piffissami sivikitsumi ingerlanneqartassaaq, suliffeqarfimmut aningaasartuutitut matussusiissutissat pisariaqartut sinnerlugit annertussusilerneqassanngillat, sulisinnaaneq atugassarititaasut nalinginnaasut iluanni periarfissaappat, eqaannerusumik sulisarnissamut akuersissuteqartoqassanani.

Utertitassat procentiat

Suliffeqarfik tapiissutisissaaq eqaannerusumik suliffeqartup akissarsiaanut 50 % *tikillugit* annertussuseqarsinnaasunik.

Inunnik ataasiakkaanik aalajangersimasumik naliliineq naapertorlugu akissarsianut tapiissutit amerlassusilerneqartassapput. Suliffeqarfimmi piginnaangorsaaqqinnermisut tapiissutit eqaannerusumik suliffeqartup sulineranut naapertuutissapput.

Malitseqartitsinerni akissarsianut tapiissutit amerlassusii tamatigorluinnaq isummerfigineqartassapput.

Siusinaartumik soraarnerussutisiaqarneq aamma eqaannerusumik suliffeqarneq ataatsikkoortinneqartassanngillat

Siusinnerusukkut oqaatigineqartutut eqaannerusumik suliffeqarneq tamakkiisumik pilersuineranut tunngavigineqartussaavoq.

Inuk annikinnerpaamik akunnattumilluunniit siusinaartumik pensionisiaqartussatut akuerisaappat taava naatsorsuutigineqartarpoq inuup taassuma sulisinnaassusia sinneqarsimassasoq suliffimmi nalinginnaasumi tapersersugaanngitsumi atorsinnaasaanik.

Inuk siusinaartumik *pensionsiaqalersimappat* saniatigullu eqaannerusumik suliffeqartitaappat taava marloriaammik pilersuinerussaag, tamannalu piginnaangorsaaqqinneq aamma eqaannerusumik suliffeqarneq pillugu malittarisassat malillugit ajornartitaavoq siunertarineqaranilu. Tamatuma saniatigut eqaannerusumik suliffeqartitaasup akissarsiaasa minnerpaamik affai sulisitsisup akilertussaavai, taavalu inuk siusinaartumik pensionisiaqalissutigisariaqakkaminik sulisinnaassusikillimasooq tapersersugaanngitsumik sulisuusup sulinermini tunniussinnaasaanik tunniussinnaassuseqarunnaangilaq. Tamanna sulisitsisumut naammattumik kajuminnassuseqarnavianngilaq. Siusinaartumik pensionisialik nalinginnaasumik sulisup sulisinnaassusiata affaa sinnerlugu sulisinnaassuseqarsimappat siusinaartumik pensionisiaqalersitsinermut tunngavigineqartut nalileqqittariaqarsinnaapput.

Malitseqartitsineq

Eqaannerusumik suliffeqartitsinermut tunngasut malitseqartinneqartarnerisa amerlassusiat naammaginarpoq tassaavoq ukiumut ataasiartarneq. Akuersissutini nutaani ukiup affaannaata qaangiunnerani malitseqartitsinissaq iluaqutaasinnaavoq.

Peqqussummi § 13, imm. 2 malillugu iluaqusersuutininik pisinnermut taperserineqarsinnaaneq imaluunniit suliffeqarfiup arlaatigut aqqissorneqarsinnaanera eqqumaffigisigit.

Qanoq akulikitsigisumik malitseqartitsisoqartarnissaa peqqussummi immikkut piumasarineqanngilaq.

Malitseqartitsineq soorunami suliffimmi ingerlanneqartassaaq, tassanilu sulisitsoq/attaveqaat, eqaannerusumik suliffeqartitaasoq aamma Majoriamiit sullissisoq peqataasassapput.

Kingullermik malitseqartitsinermiit nutaanik qajassuussassaqaqarnersoq imaluunniit allanik qajassuussassaqaqalernersoq isummerfigineqartassaaq. Tassunga atatillugu akissarsianut tapiissutit amerlassusii iluarsisariaqarnersut isummerfigissallugu naleqqutissaaq.

Malitseqartitsinermut atatillugu pineqartup eqaannerusumik suliffeqarnissamut piumasaqaatinik suli naammassinnittuunera isummerfigineqartassaaq.

Aningaasaliissutaasut atuuffissaasa sivissusissaa

Peqqussut:

”Akissarsianut tapiissutit akilersorneqarsinnaapput ukiut 5-it ataavartumik angullugit kiisalu

”Inunnut 40-t sinnerlugit ukiulinnut sulisinnaassutsip appariaataa ataavartuuppat, tak. § 15, imm. 4, akissarsianut tapiissutit ataavartunngortinneqarsinnaapput.”

- Piginnaanngorsaaqqinnermut peqqussummi § 16, imm. 3 aamma 4

Ukiut pingasukkaarlugit sulisinnaassutsimik nalilersueqqittarneq

Peqqussut:

”Inuit eqaannerusumik suliffeqartuusut minnerpaamik ukiut pingasukkaarlugit sulisinnaassusertik nalilerseqqittassavaat, taamaattorli takuuk imm. 4.” kiisalu

”Inuit 40-t sinnerlugit ukiullit imaluunniit inuit nakorsamit nalunaarutikkut sulisinnaassusiat inaarutaasumik aalajangiiffiusimasut sulisinnaassusertik nalilerseqqissanngilaat.”

- Piginnaanngorsaaqqiinnermut peqqussummi § 15, imm. 3 aamma 4

Sulisinnaassusermik nalilersueqqittarneq oqaatigineqarneratut paasineqartassaaq. Pineqartup sulisinnaassutsimigut nukissaqassusia aporfissaqassusialu naliliivigineqartassapput (piginnaanngorsaaqqinnermut immikkoortortami eqqumaffigisassat tallimat takukkit), peqqissutsikkut killiffik pisussatullu ilimagisat pillugit nakorsamiit paasissutissanik pissarsisoqassaaq, taavalu sulinikkut tunniussat, takkuttarneq allallu eqqarsaatigalugit eqaannerusumik suliffeqarnerup ingerlanera naliliivigineqassalluni.

Akissarsiat pillugit isumaqatigiissut

Eqaannerusumik suliffeqartoq atorfeqarfigisami kattuffiit isumaqatigiissutaat naapertorlugit akissarsiaqassaaq, imaluunniit suliamut taama ittumut nalinginnaasumik akissarsiaritinneqartartunik akissarsiaqartitaassalluni.

Sulisitsisoq soorunami immikkut qaffasissunik akissarsiaqartitsisinnaatitaallunilu tapeqartitsisinnaatitaavoq, tamanna suliffeqarfiup eqaannerusumillu suliffeqartup namminneq akunnerminni aalajangigassaraat. Kattuffiit isumaqatigiissutaat naapertorlugit akissarsianut kommune namminersorlutillu oqartussat tapeqartitsisinnaapput.

Akissarsianut isumaqatigiissummi ersarissumik allassimassapput akissarsiat suuneri aamma tapit allallu suuneri.

Sunut akissarsiatigut tapiiffigineqarsinnaaneri pillugit – aningaasartuutunik utertitsisarnermut immikkoortoq takuuk.

Eqaannerusumik suliffeqartitsineq pillugu isumaqatigiissummut ilanngullugu – imaluunniit tassunga ilanngussatut – atorfinitsitsinermut isumaqatigiisusiortoqartariaqarpoq, tassani suliassat, akissarsiat, napparsimanermi atugassarititaasut, suliunnaarsitsinissamik ilimasaarivissat allallu atorfinitsitsinermi pissutsit nalinginnaasut atuuttuusartut allassimassallutik.

Atorfinitsitsinermut isumaqatigiisusiornikkut eqaannerusumik suliffeqartitaasup aaqqissugaasunik isumaqatigiisutaareersunillu atugassaqartitaanissaa qularnaarneqassaaq.

Immikkut tapinut aningaasartuutit utertinneqarneq ajorput

Akissarsiat pillugit isumaqatigiisutit pillugit immikkoortumi oqaatigineqartutut sulisitsisoq immikkut qaffasissumik akissarsiaqartitsiniarluni immikkullu tapeqartitsiarluni aalajangersinnaavoq. Tamanna kommunimut aamma namminersorlutik oqartussanut attuumassuteqanngilaq.

Isumaqatigiisutit naapertorlugit eqaannerusumik suliffeqartitaasup akissarsiasatut pisinnaatitaaffigisaanit qaffasinnerujussuarnik sulisitsisup akissarsiaqartitsisarnera assersuutissaqarpoq. Akissarsiat affaannut tapiissuteqartarneq pissutigalugu sulisitsisoq taama iliorsinnaanngortarpoq.

Akissarsiat ilaannut, isumaqatigiisutaatini pisinnaatitaaffigineqartut avataaniittunut, tapiissuteqartoqarsinnaannginnera kommunip sulisitsisullu eqqumaffigissavaat.

Nuunneq

Eqaannerusumik suliffeqartitsinermi sumi najugaqarneq apeqqutaatinneqanngilaq. Inuk eqaannerusumik suliffeqartitaasooq illoqarfimmut allamut nuukkuni taama suliffeqarsinnaanermut piginnaatitaaffini piginnassavaa.

Suliffissaaleqineq, eqaannerusumik suliffimmik annaasaqarneq

Inuup eqaannerusumik suliffigisani annaappagu, taamalu isertitaaruppat, suliffissarsiorunut ikiorsiissutinik pisinnaatitaassanngilaq, killilimmik sulisinnaassuseqarnini pissutigalugu (taamaattumik eqaannerusumik suliffeqartoq).

- Suliffissarsiorunut ikiorsiissutit pillugit Inatsisartut inatsisaat: § 1. Suliffissaaleqisutut sulileriaannaasutut isigineqassaaq inuk suliffeqalernissaminut piareersimasooq, siumoortumillu immikkut suliniuteqarfigineqaaqqaarani sapaatip akunneranut minnerpaamik akunnerni 20-ini suliffeqalersinnaasoq.

Eqaannerusumik suliffeqartitaasooq suliffissaaleqisooq pisortanit ikiorsiissutit malillugit ikiorneqarnissamik qinnuteqarnissamut innersuunneqarpoq.

Eqaannerusumik suliffeqartitaasooq suliffissaaleqisutut allatulli nammineerluni allamik suliffissarsiorunissamut pisussaaffeqarpoq.

Allaffissorneq aamma naammagittaalliuteqarneq

Akiliutit utertinneqartarneri

Suliffeqarfinni piginnaanngorsaqgittarneq aamma eqaannerusumik suliffeqarneq

Sulisitsisoq piginnaanngorsaqgittumut/eqaannerusumik suliffeqartumut toqqaannartumik akissarsisitsisarpoq, akissarsianullu tapiissutit isumaqatigiisutaasut akilerneqarnissaat pillugu akiligassiisummik kommunimut nassiussisarluni. Kommunip sulisitsisumut akiligassat akilertarpai, aamma akissarsiat allagartaat akiligassiisutillu sulisitsisumeersup assilineqarnera ilanngullugu akiligassiisutit

affaanik akiligassaq Isumaginninnermut, Ilaqutariinnut, Suliffeqarnermut, Nunamullu Namminermut Naalakkersuisoqarfimmur ingerlatittarlugu.

Qulaajaaneq suliffimmilu misiliineq.

Qulaajaavigneqarnerup nalaani qulaajaaneq sioqqullugu pilersorneqarsimanertulli pisortaniit pilersorneqarnissamut pisinnaatitaaffeqartoqartarpoq. Kommune sulinermit misiliinissamut aningaasanik immikkoortitsiniaruni taamaaliorsinnaatitaavoq innuttaasup suliffeqarnermut utersaarnissaa siunertarlugu.

Ilinniagaqarneq allamillu ilinniagaqarneq

Piginnaangorsaaqqittup ilinniartutut tapiissutisiassarinnasai kommunip akilissavai aamma akiligassiissummut uppersaatit pisariaqartut ilanngullugit aningaasat affaat Isumaginninnermut, Ilaqutariinnut, Suliffeqarnermut Nunamillu Namminermut Naalakkersuisoqarfimmur nassiutissallugit.

Iluqausersuutit pisariaqartut, peqqussummi § 13, imm. 2:

Aningaasartuutit avinneqartarput kommunip aamma Namminersorlutik Oqartussat akornanni, akiligassiissullu Isumaginninnermut, Ilaqutariinnut, Suliffeqarnermut, Nunamullu Namminermut Naalakkersuisoqarfimmur nassiunneqarluni.

Naammagittaalliuteqarneq

Piginnaangorsaaqqinnissat aamma eqaannerusumik sulisarneq pillugu aalajangiinerit naammagittaalliutigineqarsinnaangillat.

Naammagittaalliutigineqarsinnaasut tassaapput aalajangersakkat tulluuttut malillugit aalajangiinerit:

- Peqqussummi § 3: Inuk piginnaangorsaaqqinnissamut piumasaqaatinik naammassinninnersoq kommunip aalajangiiffigisassaraa.
- § 10: Kommuni piginnaangorsaaqqinneq aaqquissuutissavaa sapinngisamik sivikinnerpaamik sivissusilerlugu. Piginnaangorsaaqqinneq aallaaviatigut ukiut marluk sinnerlugit ingerlanneqarsinnaangilaq, taamaattoq takuuk imm. 2.
- Imm. 2. Kommuni piffissamik piginnaangorsaaqqittup piginnaangorsaaqqinnermut ikiorsiissutisinnasaffianik sivitsuisinnaavoq,
- 1) piffissaq piginnaangorsaaqqiffiusoq timikkut tarnikkulluunniit piginnaasakillismaneq pissutigalugu ukiut marluk ingerlaneranni naammassineqarsinnaangippat imaluunniit pissutsit immikkut ittut taamaaliornissamut pissutaappata, imaluunniit
 - 2) napparsimanermik, qitornanik napparsimasunik imaluunniit qitornanik timikkut tarnikkulluunniit piginnaasakillisimasunik paarsinermik, erninermit sulingiffeqarnermik imaluunniit inuttut atugarisanik immikkut ittunik pissuteqartumik piginnaangorsaaqqinnerup kinguarsarneqarnera pissutigalugu piginnaangorsaaqqittup ukiut marluk iluanni piginnaangorsaaqqinneq naammassisinnaangippagu.

§ 15: Atugassarititani nalinginnaasuni qulaajaaniarluni ingerlassap nalaani, imaluunniit piginnaangorsaanimik suliaqarnerup kingornatigut pineqartoq suliffimmik pissarsinissamik imaluunniit attassinissamik angusaqarsinnaanngitsoq paasineqarpat inuk eqaannerusumik suliffeqalersillugu atorfinitsinneqarsinnaavoq.

Imm. 2. Atugassarititani pissusissamisoortuni suliffeqareersimalluni inuup sulisinnaassutsimi ilaanik tassanngaannartumik annaasaqartoq sulisitsisoq peqatigalugu sioqqutsisumik piginnaangorsaaqqinneq ingerlateqqaarnagu sulisitsisumi tassani eqaannerusumik suliffeqarnissamat qinnuteqarsinnaavoq.

Imm. 3. Inuit eqaannerusumik suliffeqartuusut minnerpaamik ukiut pingasukkaarlugit sulisinnaassusertik nalilerseqqittassavaat, taamaattoq takuuk imm. 4.

Imm. 4. Inuit 40-t sinnerlugit ukiullit imaluunniit inuit nakorsamit nalunaarutikkut sulisinnaassusiat inaarutaasumik aalajangiiffiusimasut sulisinnaassusertik nalilerseqqissanngilaat.”

§ 13 imm. 2: Piginnaangorsaaqqinnerup nalaani immikkut tapiissutinik tunniussisoqarsinnaavoq ataasiartumik aningaasartuutissanut pisariaqartunut.

- Naammagittaalliorsinnaaneq peqqussummi § 20-imi ersippoq.

Innuttaasup aalajangiineq naammagittaalliutigissallugu kissaateqaruni Isumaginninnermut Naammagittaalliuteqartarfimmuut saaffiginnissaaq aalajangiinerup tigneraniit sap. ak. 6-it qaangiutsinnagit.

Malittarisassat attuumassuteqartut allat

Allakkiornissamat pisussaaffik

- Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat nr. 9, 13. juni 1994-imeersoq

”§ 6. Suliassani ingerlatsinermut oqartussaasunit aalajangiiffigineqartussani oqartussaq paasissutissanik suliassamat tunngassuteqarluinnartumik suliassap aalajangiiffigineqarnissaanut pingaaruteqartunik oqaasiinnakkut pissarsisoq, paasissutissanilluunniit taamaattunik allatut iliorluni paasisaqartoq paasissutissat taakku imaat pillugit allakkiussaaq. Taamaattorli paasissutissat taakku suliassap allakkiartaasa ilaanni takuneqarsinnaappata tamanna atuutinngilaq.”

Inunnut paasissutissat pillugit inatsit

- Kalaallit Nunaanni inunnut tunngasumik paasissutissat pillugit inatsimmi §§-6-8, paasissutissanik ingerlatitseqqittarneq pillugu.

Allanut napangiussisussaataaneq

- Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersumi § 27.

Paasissutissanik ingerlatitseqqittarneq

- Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersaq

”§ 28: Inuit ataasiakkaat allanit sunissaqaratik pissuserisaat, tamakkununga ilanngullugit naggueqatigiinnut sunut ilaanermut, upperisarsiornermut aamma ammip qalipaataanut, naalakkersuinermut, peqatigiiffeqarnermut, kinguaassiuutinik atuinermut, pinerluttarnermut tunngasut pillugit paasissutissat kiisalu peqqissusermut, inooqatigiinnermi ajornartorsiutinut annertuunut aamma inuulluarniutinik assigisaannillu atuinermut tunngasut pillugit paasissutissat ingerlatsinermut oqartussaasunut allanut ingerlateqqinneqartassanngillat.

Imm. 2. Taamaattorli paasissutissanik imm. 1-imi taaneqartunik ingerlatitseqqittoqarsinnaavoq, 1) inuk paasissutissiisutigneqartussa qakuersimappat,(...)”

Illuatungiusunik tusarniaaneq

- Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersumi §§ 19 – 20.

Tunngavilersuisarneq

- Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersumi kapitali 6:

”§ 22. Aalajangiineq allakkatigut nalunaarutigineqaruni aalajangiinermit tunngaviusumik ilaqartinneqassaaq, suliami peqataasumut tassunga tapersiisuulluinnanngikkuni.

§ 23. Aalajangiinermit oqaasiinnakkut nalunaarfigineqartup aalajangiineq imminek tapersiisuulluinnanngippat piumasarisinnaavaa aalajangiinermit tunngaviusoq allaganngorlugu piunallugu. Tamatuminnga qinnuteqaat oqartussaasunut saqqummiunneqassaaq aalajangiinermit nalunaarutip suliami peqataasumit tiguneqarnerata kingornagut ullut 14-it qaangiutsinnagit.

Imm. 2. Tunngaviusup allaganngorlugu nalunaarutigineqarnissaanik imm. 1 malillugu qinnuteqaat sapinngisamik piaartumik akineqassaaq. Qinnuteqaat oqartussaasumit akissuteqartussamit tiguneqarnermi kingorna ullut 14-it qaangiutinnginneranni akineqanngippat oqartussaasup taassuma suliami peqataasoq tamatumunnga pissutaasumik kiisalu qinnuteqaatip qaqugu akineqassangatinneranik nalunaarfigissavaa.

§ 24. Aalajangiinermit tunngaviusumik nalunaarummi innersuussutigineqassapput inatsisini maleruaqqusat aalajangiinermit tunngavigneqartut. Maleruaqqusat tamakku malillugit aalajangiineq oqartussaasuni sulisut isumaannik tunngaveqarpat tunngaviusumik nalunaarummi taaneqassapputtaaq pissutaasut pingaarnerusut isummat tamakkua atornerannut aalajangiisuunerusut.

Imm. 2. Tunngaviusumik nalunaarummi pisariaqarpat naatsumik erseqqissarneqassapputtaaq paasissutissat suliami pissusiviusunut tunngasut aalajangiinermit annertuumik pingaartinneqartut.

Imm. 3. Tunngaviusumik nalunaarutip imarisai killiliiffigineqarsinnaapput suliami peqataasup tamakkununga ilisimasaqarnini nammineq iluaqutigiumallugu atuiumasinnaanermik soqutiginninnera inuk taanna nammineq eqqarsaatigalugu imaluunniit inuunnaat allat pisortalluunniit soqutigisat pissutiginerullugit minnerutittariaqartutut isumaqarfiginarpas, tak. § 15.”

Naammagittaalliornissamut ilitersuut

- Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersoq

”§ 25: Aalajangiinerit ingerlatsineranut oqartussaasunut allanut naammagittaalliutigineqarsinnaasut allakkatigut nalunaarutigineqarunik naammagittaalliorsinnaanermut ilitersuummik ilaqartinneqassapput tassuuna nalunaarlugit naammagittaalliortarfik naammagittaalliussagaannilu qanoq iliortariaqartoq immaqalu aamma ullut qassit qaangiutsinnagit naammagittaalliortariaqartoq. Tamakkuninngali ilaqartinneqassanngillat aalajangiineq aalajangiiffigineqartumut tapersiisuulluinnarsimappat.”

Suliami peqataasinnaannginneq

- Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersoq, Kapitali 2, §§ 3-6.

Ilanngussat

Suliffeqarfinni piginnaanngorsaaqqittarnermut isumaqatigiissut

Piffissap ilaani nikerartumi sulisarnissamut isumaqatigiissut

Suliffeqarfimmi piginnaanngorsaaqqinnissamik isumaqatigiissut

Aftale om Virksomhedsrevalidering

Innuttaasoq pillugu paasisutissat/Oplysninger om borger

Ateq/navn:	CPR-nr:
Najugaq/Adresse:	Telefon:

Suliffeqarfik pillugu paasisutissat /Virksomhedsoplysninger

Sulisitsisoq/Arbejdsgiver:	Suliffeqarfiup atia/Virksomhedens navn:
Najugaq/Adresse:	Telefon:
Attavigisassaq /Kontaktperson:	

Suliassat sularineqartartussat pillugit paasisutissat /Oplysninger om arbejdsopgaver

Atorfiup taaguutaa /Stillingsbetegnelse:	Piumasaqaatit (Biilernermet allagartaaq, uppernarsaatit)/ Krav (Kørekort, attester):
Suliffeqarfimmi suliassat ersarissarneqarneri:/Tydelig beskrivelse af arbejdsopgaver:	
Piffissaq isumaqatigiissuteqarfiusoq / Aftalt periode: Ullormiit / Fra dato:	Ullormut / Til dato:
Akissarsianut tunngasut / Lønforhold:	
Majoriami attaveqaataasoq / Kontaktperson Majoriaq:	

Akissarsianut tapiissutit / Løntilskud

Uangaaniit / Fra:	Uunga / Til:	Akunnerit suliffiusut /Arbejdstimer:	Tapiissutit / Tilskuds%:

Isumaqatigiissut sularineqartoq Inatsisartut peqqussutaat nr. 4, ulloq 31. Maj 2001-imeersoq kiisalu Namminersornerullutik Oqartussat nalunaarutaat nr. 40, ulloq 13. December 2001-imeersoq naapertorlugit. Aftalen er indgået i henhold til Landstingsforordning nr. 4 af 31. maj 2001 samt Hjemmestyrets bekendtgørelse nr. 40 af 13. december 2001.

Suliffeqarfiup isumaqatigiissutit naapertorlugit akissarsiasstatut isumaqatigiissutaasut piginnaanngorsaaqqittup suliaanut tunngatillugu akilertassavai, akissarsianullu tapiissutissanut pisinnaatitaaneq naapertorlugit akiligassiissut kommunimut nassiuttarlugu:

Virksomheden udbetaler den overenskomstaftalte løn på det aktuelle område til revalidenden og regning for den løntilskudsberettigede løn sendes til kommunen:

Suliffeqarfimmi piginnaangorsaaqqinnerup aallartinnissaa sioqqullugu akissarsianut tapiissutissat annertussusissaat isumaqatigiissutigineqareertarpoq.

Før virksomhedsrevalideringen påbegyndes er der truffet aftale om løntilskuddets størrelse.

Suliffeqarfiup kommunimut peqanngittarnerit qanorluunniit ittut ilisimatitsissutigisassavai.

Virksomheden orienterer kommunen om alle former for fravær.

Isumaqatigiissut ingerlaavartumik nalilersuivigineqartassaaq, malitseqartitsisarnerillu qaammatikkaartumik suliarineqartassallutik.

Aftalen skal løbende evalueres og opfølgning finder sted en gang månedligt.

Isumaqatigiissut atorunnaarsinneqarsinnaavoq suliffeqarfimmiit imaluunniit kommunimiit illuatungeriit nalilerpassuk isumaqatigiissut siunertaqarunnaartoq.

Aftalen kan opsiges af virksomhed eller kommune hvis en af parterne vurderer, at aftalen ikke længere tjener sit formål.

Sumiiffik aamma ulloq:

Sted og dato:

Suliffeqarfik /Virksomheden:

Piginnaangorsaaqqittoq / Revalidend:

Majoriaq, Centerlederi

Piginnaangorsaaqqiisarnermut siunnersorti / Revalideringskonsulent

Piginnaangorsaaqqinnissamat ikiorsiisarneq pillugu Inatsisartut peqqussutaat nr. 4, 31. maj 2001-imeersoq

§ 8. Sulisitsisup akilissavaa atorfinitsisineri piginnaangorsaaqqittussap akissaatitigut isumaqatigiissutit naapertorlugit akissarsiaqartinnissaa imaluunniit taamatut suliaqarnermi akissaasersuinissamat naapertuuttumik akissaateqartitsilluni. Ilinniartut pineqartillugit ilinniartunut akissaatit nalinginnaasut malillugit akissaateqartitsisoqassaaq.

Landstingsforordning nr. 4 af 31. maj 2001 om revalidering

§ 8. Arbejdsgiveren betaler til revalidenden den overenskomstmæssige løn på det aktuelle ansættelsesområde eller den løn, som sædvanligvis gælder for tilsvarende arbejde. I lærlingeforhold betales sædvanlig lærlingeløn.

Suliffeqarfimmi piginnaangorsaaqqinnermi akissarsianut tapiissutit, piginnaangorsaaqqinnermut pilersaarut, piginnaangorsaaqqinnermi ikiorsiissutit aamma eqaannerusumik suliffeqarneq pillugit Namminersornerullutik Oqartussat nalunaarutaat nr. 40, 13. december 2001-imeersoq

§ 1. Piginnaangorsaaqqittumik suliffeqarfimmi sungiusaanermi ilinniartitsinermilu suliffeqarfik akissarsiaqartitsissaaq, piginnaangorsaaqqittup suliffeqarfimmi sulineranut naleqqiullugu tiiminut suliffiinut naapertuuttumik.

Imm. 2. Akissarsianut aningaasartuutit 20%-iisa 80%-iisalu akornanni annertussuseqartut kommunip suliffeqarfimmut utertillugit akilissavai. Piginnaangorsaaqqittup sulisinnaassusia utertillugit akiligassanik annertussusiliineri apeqqutaavoq aalajangerneqartassallunilu sivikinnerpaamik sapaatip akunneri sisamakkaarlugit. Suliffeqarfimmi piginnaangorsaaqqinneq aallartitsinnagu kommunip suliffeqarfiullu akornanni erseqqinnerusumik isumaqatigiissusiortoqarsimassaaq.

Hjemmestyrets bekendtgørelse nr. 40 af 13. december 2001

§ 1. Ved optræning og oplæring af en revalidend på en virksomhed betaler virksomheden en lønandel, der svarer til revalidendens arbejdsindsats i forhold til antal timer, revalidenden er beskæftiget på virksomheden.

Stk. 2. Kommunen refunderer mellem 20% og 80% af lønudgiften til virksomheden. Refusionsssatsen afhænger af revalidendens arbejdsevne og fastsættes for mindst 4 uger ad gangen. Forud for virksomhedsrevalideringen skal der være indgået en nærmere aftale mellem kommunen og virksomheden.

Piffissap ilaani nikerartumi sulisarnissamut isumaqatigiissut

Aftale om fleksjob

Innuttaasoq pillugu paasissutissat/Oplysninger om borger

Ateq/navn:	CPR-nr:
Najugaaq/Adresse:	Telefon:

Suliffeqarfik pillugu/Virksomhedsoplysninger

Sulisitsisoq/Arbejdsgiver:	Suliffeqarfiup atia/Virksomhedens navn:
Najugaaq/Adresse:	Telefon:
Saaffissaq/Kontaktperson:	

Suliassanik paasissutissiineq/Oplysninger om arbejdsopgaver

Atorfiup taaguutaa/Stillingsbetegnelse:	Isumaqatigiissut atortuulissaaq ulloq:/ Aftalen træder i kraft d.:
Suliffeqarfimmi suliassat ersarissarneqarneri: /Tydelig beskrivelse af arbejdsopgaver:	
Asattuussinissamik pisariaqartitsinerup annertussusia / Skånebehov:	Piffissaq suliffiususaaq / Arbejdstid:
Akissarsianut tunngasut/Lønforhold:	
Majoriami attaveqaataasoq / Kontaktperson Majoriaq:	

Akissarsianut tapiissutit: / Løntilskud:

<input type="checkbox"/> 50% <input type="checkbox"/> 40% <input type="checkbox"/> 30% <input type="checkbox"/> 20% <input type="checkbox"/> 10% <input type="checkbox"/> Allat - andet:
--

Isumaqatigiissut suliaavoq naapertorlugit Inatsisartut peqqussutaat nr. 4, ulloq 31. maj 2001-imeersoq kiisalu Namminersornerullutik Oqartussat nalunaarutaat nr. 40, ulloq 13. december 2001-imeersoq. Aftalen er indgået i henhold til Landstingsforordning nr. 4 af 31. maj 2001 samt Hjemmestyrets bekendtgørelse nr. 40 af 13. december 2001.

Suliffeqarfiup toqqaannartumik piffissap ilaani nikerartumi sulisartumut akissarsiassat akilertassavai, akissarsiallu ilaanut tapiiffigineqartussamut tapiissutissanut akiligassiissut kommunimut nassiuttassallugu, akissarsiat allagartaata tapiiffigineqartussap assilineqarnera ilanngullugu uunga: Virksomheden udbetaler løn direkte til fleksjobber, og regning for den løntilskudsberettigede løn sendes til kommunen sammen med kopi af samtlige lønsedler, der søges løntilskud til:

(Mail-ip adressia aamma allakkatigoortitsinermut adresse / Mailadresse og postadresse:)

Taamaallaat akissarsianut tapiissuteqartoqarsinnaavoq suliassaqarfimmut pineqartumut atuuttoq isumaqatigiissut naapertorlugu. Inuttut aamma immikkut ittumik tapisianut aningaasartuutit tapiiffigineqarsinnaanngillat.

Der kan kun gives løntilskud af den overenskomstafalte løn på det aktuelle område. Personlige og særlige tillæg er ikke tilskudsberettiget.

Isumaqatigiissutaasoq ingerlaavartumik nalilersuivigineqartassaaq, malitseqartitsisarnerillu minnerpaamik qaammatit 6-ikkaartumik ingerlanneqartassalluni.

Aftalen skal løbende evalueres og opfølgning finder sted mindst en gang hver 6. måned.

Isumaqatigiissut atorunnaarsinneqarsinnaavoq suliffeqarfimmit imaluunniit kommunimit illuatungeriit nalilerpassuk isumaqatigiissut siunertaqarunnaartoq.

Aftalen kan opsiges af virksomhed eller kommune hvis en af parterne vurderer, at aftalen ikke længere tjener sit formål.

Sumiiffik aamma ulloq / Sted og dato:

Suliffeqarfik / Virksomheden:

Piffissap ilaani nikerartumi sulisartutut atorfeqartoq / Fleksjobansat:

Majoriaq, Centerlederi:

Piginnaangorsaaqqiinnermut siunnersorti / Revalideringskonsulent:

Piginnaangorsaaqqinnissamut ikiorsisarneq pillugu Inatsisartut peqqussutaat nr. 4, 31. maj 2001-imeersoq

§ 16. *Eqaannerusumik suliffimmi sulisumut sulisitsisoq akissaasersuissaaq sulinnermut naapertuuttumik. Kommuni sulisitsisumut toqqaannartumik akissarsianut tapiissuteqassaaq.*

Imm.2. Tapiissutit suliffimmi pineqartumi isumaqatigiissutit malillugit akissarsiat imaluunniit taamatut sulinnermi akissarsiaritineqartut 50 %-ii sinnernagit annertussilerneqartassapput

Piginnaangorsaaqqinnissamut ikiorsisarneq pillugu Inatsisartut peqqussutaat nr. 4, 31. maj 2001-imeersoq

§ 16. *Arbejdsgiveren betaler lønnen, der svarer til arbejdsindsatsen til den ansatte i fleksjob. Kommunen yder tilskud til lønnen direkte til arbejdsgiveren.*

Stk.2. Tilskuddet kan ikke overstige 50% af den overenskomstmæssige løn på det aktuelle ansættelsesområde eller af den løn, som sædvanligvis gælder for tilsvarende arbejde.

Suliffeqarfimmi piginnaangorsaaqqinnermi akissarsianut tapiissutit, piginnaangorsaaqqinnermut pilersaarut, piginnaangorsaaqqinnermi ikiorsiissutit aamma eqaannerusumik suliffeqarneq pillugit Namminersornerullutik Oqartussat nalunaarutaat nr. 40, 13. december 2001-imeersoq

§ 9. *Eqaannerusumik suliffeqarnissamik kommuni neqerooruteqarsimappat akissarsiat sulinnermilu atugassarititat allat, ilanngullugu piffissaq suliffissaq, suliqaarfimmut isumaqatigiissutit atuuttut aallaavigalugit aalajangersarneqassapput. Suliqaarfimmi isumaqatigiissuteqarfiunngitsuni aallaavigineqassapput suliqaarfiit nallersuunneqarsinnaasut.*

Hjemmestyrets bekendtgørelse nr. 40 af 13. december 2001

§ 9. *Når kommunen har givet tilbud om fleksjob, fastsættes løn og øvrige arbejdsvilkår, herunder arbejdstiden, efter gældende overenskomst på ansættelsesområdet. På områder, der ikke er overenskomstdækket, tages der udgangspunkt i overenskomsten på sammenlignelige områder.*